



Era als affons ha il festival porscheu divertiment cun giugs ed animaziuns.



Hanspeter Meiler, il president dalla Cuminonza Romontscha, ha accompignau la gruppa ch'ei gest returnada dalla girada tras Flem.

FOTOS A. BEELI

Mund romontsch – capeivel e surveseivel

La cultura romontscha ei sepresentada a Flem

DAD AUGUSTIN BEELI / ANR

■ **Musica ed animaziun, prelecziuns, cudischs e discussiun libra: Quei ei stau el center la davosa fin d'jamna a Flem. Il «Mund romontsch» ha presentau el Livingruhm a Flem sia creativitad.** Flem ei stau ina dallas tginas principalas dil lungatg sursilvan. Cheu ha Igl Engiadines Steffan Gabriel perdegau avon 400 onns el lungatg dil pievel – per romontsch. Ordlunder ei igl idiom, il lungatg da scartira, sesviluppau. Flem ei era il vitg da Gian Fontana, in dils caposcribents e -poets sursilvans. El resenteva che ses convischins unfrean sapientivamein il lungatg mumma al turissem. La luschezza pigl agen lungatg fuva ida a piarder. Quei svilup ha cuntinuau d'uront decennis.

Impuls da Hamburg

La Cuminonza Romontscha da Flem seprova da tener e promover il «Mund romontsch» en vischnaunca. Cun in cert success. Ellas famiglias – buc en tuttas – tgiran ins puspei il scazi ed ei loschs dall'ierta dils perdavons. La renovaziun

dalla Senda romontscha denter Foppa e Scheia dat perdetga da quei. Ed era il festival dalla davosa fin d'jamna ha fatg allusiun d'in cert resvegl romontsch a Flem. Giuven e vegl, pign e grond, han visitau vendergis e sonda igl emprem festival romontsch el liug da cura. Cun musica ed animaziun, prelecziuns, cudischs e discussiuns libras han ins saviu s'entupar, setschintchar, tedlar e guder ina puschida multifaria d'artistas ed artists romontschs.

Il da Flem da lungatg tudestg realiseschan strusch ch'il tetel «Mund romontsch» ha negin connex cul plaid «bucca», mobein ch'igl ei il plaid general per la Romontschia. Il stausch decisiv d'instradar il festival ha dil eminent in Tudestg dau. Ell'antieriua serraria Ragettli ha Björn Günni endrizzau in local gastronomic che seperscha per produziuns da cultura. Igl ustier da Hamburg ei in grond amator dalla cultura romontscha. Il lungatg fascinescha el, ed orantut l'enorma creativdad da quella minoritad. Gia differentas gadas ha Günni envidau artists, musicists, cantaduras e cantadurs, aschia Pascal Gamboni, Fiona

Cavegn, Bibi Vaplan, Rees Coray ed auters.

«Unda romontscha va tras la tiara»

Il Livingruhm ei zuppaus ella streglia davos la Via Nova, parallel cul stradun da Flem. Ei savess esser simbolic pil romontsch che ha stuiu untgir al tudestg dominont. Günni ha intimau Barla Colucello d'organisar enzatgei specificamein «romontsch» a Flem. Cull'animadura da cultura Yvonne Gienal ha ella gudignau ina partenaria ch'ha cooperau e susteniu ella. Era la Cuminonza Romontscha ha beneventau l'iniziativa ed ei segidada. Per organisar igl emprem festival «Mund romontsch» han las duas dunas retschiert sustegn finanziar, material e personal da diversas varts. Pil program accompignont el liber ei l'aura stada ideala. Treis gadas ei Alice Bertogg, collaboratura dalla LR, ida cun gruppas da mintgamai 15 persunas «per gassas e streglias». El vitg vegl da Flem ha ella mussau scazis zuppai ed introduciu el lungatg glieud interessada. David Flepp ha sviluppuu il model adequat ch'ins sa

applicar era en auters loghens. Il program pulpiu dil festival ha delectau ed animau. Jasters ed indigens han gudiu la fin d'jamna creativa ed activa el Livingruhm a Flem. «Nies motto ei clars: promover il romontsch», aveva Colucello declarau il fenadur all'anr enten preparar ils detagls dil program. Ed ussa, ella retrospectiva? «Segir ch'ei dat entgins puncts ch'ins savess far auter e migliurar», replica Colucello. Resumond seigien ella e Gienal denton cuntanzas. Circa 170 persunas hagen visitau las occurrenz da dus dis. Era las guidas atras Flem seigien stadas visitadas bein e la glieud lagi saviu profitar dalla puschida multifaria. «Jeu crei ch'ei mondi actualmein in unda romontscha tras nossa tiara. Tals inscutters ein tschercai», constatescha la giuvna organisatura. «Era nus mein cun quell'unda – sin nossa moda e maniera», manegia ella e cumpletescha: «Nies 'mund romontsch' duei restar en moviment e nus mirein nua ch'el porta nus.» A Colucello, Gienal ed alla Cuminonza Romontscha da Flem eis ei gartegiau da marcar preschientscha cul festival e render attent al las ragischs romontschas el liug da cura.

Art cun maula da cement

■ (anr/sr) Venderdis, ils 20 da settember 2019 allas 19.00 envida Mario Cathomas alla vernissascha dall'exposiziun da ses maletgs ils pli novs. L'exposiziun cullas ovras singularas ha liug ella Galaria Burgaisa a Domat. Igl art da Cathomas ei strusch cumparegliabels cun ovras d'auters artists. El ha numnadamein sviluppuu in atgna tecnica da sgraffito avon varga dus decennis. Gia da lezzas uras haveva igl artist procurau per furore cun ses maletgs. Tuttina ha igl interpretender (oz pensiunau) fatg ina pausa artistica per dar la prioritad all'atgna fatschentia. El era occupaus cul svilup da siu product «Naturfloor» e dall'atgna fatschentia a Malans. Pér avon pauc onns ha igl um – ch'ei oriunds da Dardin – puspei entschiet a malegiar pli stedi per la finfinala exoner siu art il 2016 ella galaria Art Mineral a Malans. Ils resuns ordvart positivs a caschun dall'exposiziun ed era suenter han intimau da cuntinuar culla via artistica. Grazia alla libertad dils pensiunai ha Cathomas giu temps per esser creativs ed ussa, treis onns pli tard, expone el sias ovras las pli novas. Secapescha puspei ella tecnica da sgraffito cun maula da cement che dat in optica e profunditad tut apartia als maletgs. Per gronda part ein ils motifs abstracts, Cathomas malegia daferton denton era figurativ. Ils visitaders dall'exposiziun che cuoza aunc entochen ils 6 d'october 2019 astgan esser spanegiai da contemplar las ovras artisticas.

Ulterioras informaziuns: L'exposiziun ei aviarta mintgamai venderdis 18.00–22.00, sonda 17.00–22.00, dumengia 15.00–18.00. www.mario-art-mineral.ch



Venderdis, ils 20 da settember allas 19.00 envida Mario Cathomas alla vernissascha da ses maletgs ella Galaria Burgaisa a Domat.

MAD

reclama

Out ella prerunda dil Cup svizzer

Il CB Trun/Rabius ha spiars a casa cun 1:2 encunter igl FC Appenzell

DA PIETRO JACOMET

■ **El 16avel final dalla prerunda dil cup ha il CB Trun/Rabius beneventau igl FC Appenzell a Pustget.** Muort in viadi dalla giuventetgna da Trun han ils trenaders Donat Albin e Philippe Vincenz stuiu desister da gest otg giugadurs. Per quei motiv ein sis giugadurs dalla secund'equipa dil CB Trun/Rabius vegni tier la caschun da giugar encunter in'equipa da tiarza ligia. Aschia valevan tonaton ils Appenzelles sco favoritiss avon il giug.

Ella 7avela minuta vegnan ils hospis lu era gia da marcar igl emprem gol. In pass liung ord il miez vegn il capitani e defensor central Ramon Orlik buca da sviar, aschia ch'igl attaccader digl Appenzell ha via libra: El cuora persuls viers gol e marca cun in siet a bass el cantun il 0:1 – ina duscha freida per l'equipa da casa. Il CB Trun/Rabius quietescha denton il giug e vegn cuort suenter tier in'emprema schanza da gol. Davide Beer surgegn in bal ord la defensiun en sia currida dall'ala siado. El porta il bal el dies dalla defensiun ella zona prigulusa, nua ch'Orlando Monn munchenta mo per pauc il gol. En quella fasa ei il giug ulivs. Era ils hospis digl Appenzell vegnan suenter biebein 20



Malgrad igl engaschi ha ei buca tunschiu per Trun/Rabius.

RTR

minutas puspei tier ina bun'ocasiun. Mauro Alig tegn denton il siet ord cuorta distanza en ses mauns. La proxima acciun da gol s'aua lu puspei alla squadra da casa: Igl attaccader Remo Alig aulza cun ina fenta il bal sper siu cuntergiugadur vi e plazzescha il bal cun in bellezza siet ord l'aria gest sut la latta – il goli ha neginas schanzas ed ei stat 1:1. Tochen

pausa schabegia plinavon nuot spectacolar.

L'entschatta dalla secunda mesad ei quasi ina copia dall'emprema. Suenter mo paucas minutas anfla in bal liung digl FC Appenzell la via sper la defensiun dil CB Trun/Rabius vi ed in attaccader stat persuls avon il gol. Ed era quella ga munta in siet a bass el cantun liung il gol –

1:2. Puspei sto il caucasa cuorer suenter ad in gol. Enqualga vegn il bal silsuenter datier dil gol dils Appenzelles, tier ina schanza prigulusa vegn ei denton pér puspei ella 71avela minuta: Cun in'alzada maligna ord 20 meters emprova Remo Alig da cuglienar il goli. Quell'emprova munchenta la finamira mo pil ner dall'ungla. Il caucasa sestenta dad egualisar, il giug vegn denton pli e pli hectics. Cuort avon la fin muossa igl arbiter schizun aunc ina carta cotschna: Fabian Kolter tegn cun omisus mauns anavos Clau Berther, lez reagescha memia impulsiv e dat anavos. Igl arbiter interpretescha quei sco «act da violenza» e castigia il giugadur da Trun leusuenter. Quei ei medemamein la davos'acciun commemorabla ed aschia spiarla il CB Trun/Rabius igl emprem giug da casa da quella sesiun.

Cunquei che l'equipa sursilvana era in bionton mischedada san ins denton tschintchar d'ina prestaziun cuntenteivla. Il giugadurs dalla secund'equipa han fatg bein lur pensum e mussau ch'els san era sin quei nivel tener petg. Tuttina ei l'aventura Cup svizzer pil CB Trun/Rabius vargada, aschia che l'equipa sa ussa seconcentrar cumpieinamein sil campinadi da tiarza liga.

TV

Südostschweiz informiert

Topaktuelle Nachrichten aus Ihrer Region von Montag bis Freitag ab 18 Uhr.

Nur auf TV Südostschweiz

südostschweiz

AGID SVIZZER PER LA MUNTOGNA
TEL 01/712 60 60 FAX 01/712 60 50
www.berghilfe.ch info@berghilfe.ch

AUTO SVIZZERO AI MONTANARI

SCHWEIZER BERGHILFE